



**KENNISGEWING AAN BEWEERDE OORTREDER TEN OPSIGTE VAN 'N BEVEL VIR
MIV-TOETSING**

*Artikel 31(5)(b) van die Wysigingswet op die Strafwet (Seksuele Misdrywe en Verwante Aangeleenthede), 2007
(Wet No. 32 van 2007)*

IN DIE LANDDROSHOF VIR DIE DISTRIK VAN
GEHOU TE
SAAKNO:

(Moet deur die ondersoekbeampte aan die beweerde oortreder oorhandig word)

Aan:
(die beweerde oortreder) wat aangekla word van die misdryf van
.....
teen (die slagoffer).

Die doel van hierdie Kennisgewing is om u in te lig dat die voormelde hof 'n bevel uitgereik het dat u, sonder u toestemming, vir MIV getoets word en die uitslag van die toets openbaar gemaak word aan die slagoffer of 'n belanghebbende persoon wat namens die slagoffer optree en, waar toepaslik, aan die aanklaer wat verantwoordelik is vir u vervolging of enige ander verwante hofverrigtinge.

Wat is die MIV-infeksie?

MIV verwys na 'n infeksie met die menslike immuno-gebreksvirus. MIV vernietig belangrike selle wat die immuunstelsel beheer en ondersteun. As gevolg daarvan kan die liggaam se natuurlike beskermingsmeganismes nie weerstand teen siektes bied nie. Die meeste mense wat met MIV besmet is, ontwikkel uiteindelik VIGS en sterf aangesien hul liggame nie meer enige weerstand teen siektes soos TB, longontsteking en breinvliesontsteking kan bied nie. Besmetting met MIV het derhalwe ernstige gevolge vir u as individu. Daar is tans geen geneesmiddel vir MIV / VIGS nie.

Hoe word MIV oorgedra?

MIV word op drie maniere oorgedra:

- tydens seksuele omgang;
- wanneer MIV-besmette bloed direk in die liggaam oorgetap word; en
- vanaf 'n moeder na kind gedurende swangerskap, geboorte of tydens borsvoeding.

Kan MIV oorgedra word tydens 'n seksuele misdryf?

Ja. Indien daar enige blootstelling aan HIV-besmette bloed, semen of vaginale vloeistowwe tydens die beweerde misdryf is, kan MIV oorgedra word.

Hoekom moet ek vir MIV getoets word?

U kon die slagoffer aan MIV blootgestel het tydens die beweerde seksuele misdryf of misdryf, soos in artikel 27 van die Wet omskryf, waarvan u aangekla word. (Artikel 27 van die Wet omskryf 'n "seksuele misdryf" as 'n seksuele misdryf waarin die slagoffer aan die liggaamsvog van die beweerde oortreder blootgestel kon word en 'n "misdryf" word omskryf as 'n misdryf, behalwe 'n seksuele misdryf, ten opsigte waarvan die MIV-status van die beweerde oortreder relevant kan wees vir doeleindes van ondersoek en vervolging.) In die lig van die ernstige gevolge van MIV-besmetting en slagoffers se vrees om met MIV besmet te word, is die reg aan hulle

verleen om aansoek te doen vir die MIV-toetsing van hul beweerde oortreders en vir die bekendmaking van die toetsuitslae. Die ondersoekbeampte kan ook aansoek doen om u vir MIV te laat toets.

Hoe sal kennis aangaande my MIV-status die beweerde slagoffer help?

Die uitslag van die toets kan hom of haar help —

- om te besluit om mediese behandeling te ontvang wat duur is en ernstige nuwe-effekte het, maar wat kan verhoed dat hy of sy die virus opdoen;
- om stappe te neem om te verhoed dat die virus verder deur hom of haar oorgedra word aan ander mense (byvoorbeeld die slagoffer se seksmaat, of aan haar baba as sy verwagting is of borsvoed); en
- om die slagoffer gemoedsrus te gee aangaande sy of haar moontlike blootstelling aan MIV gedurende die seksuele misdryf.

Wie het die bevel verleen dat ek vir MIV getoets word?

'n Landdros van die landdroskantoor in die distrik waar u na bewering die seksuele misdryf of misdryf gepleeg het, het die bevel verleen.

Op watter grondslag is die hofbevel verleen?

Die landdros het die bevel verleen na oorweging van getuienis onder eed deur die persoon wat aansoek gedoen het dat u vir MIV getoets word en deur die ondersoekbeampte. Die landdros is op 'n *prima facie* - grondslag oortuig dat —

- u 'n seksuele misdryf of misdryf gepleeg het teen die slagoffer wat aansoek gedoen het dat u vir MIV getoets word, of namens wie aansoek gedoen is;
- die slagoffer in die loop van die betrokke misdryf aan u liggaamsvog (semen, bloed of vaginale vloeistowwe) blootgestel kon gewees het; en
- nie meer as 90 kalenderdae verloop het sedert die datum van die beweerde misdryf nie.

U moet kennis neem dat die bestaan van *prima facie*-getuienis teen u nie beteken dat indien die strafsak teen u op verhoor gaan, u skuldig bevind gaan word aan die misdryf nie. Die Staat sal steeds bo redelike twyfel moet bewys dat u die misdryf, waarvan u aangekla word, gepleeg het. *Prima facie* getuienis word slegs gebruik vir die aansoek om u, sonder u toestemming, vir MIV te toets.

Kan ek weier dat my bloedmonsters vir MIV getoets word?

Nee. Dit is 'n hofbevel. Die landdros kan ook 'n lasbrief vir u inhegtenisneming uitreik indien daar rede is om te glo dat u nakoming van die bevel sal vermy of reeds vermy het. Indien u versuim of weier om die bevel na te kom of nakoming vermy, is u skuldig aan 'n misdryf en by skuldigbevinding strafbaar met 'n boete of gevangenisstraf vir 'n tydperk van hoogstens drie jaar.

Hoe word ek vir MIV getoets?

Die ondersoekbeampte sal u na 'n geregistreerde mediese praktisyn of verpleër of verpleegster neem wat by dieselfde geleentheid twee bloedmonsters van u sal neem. Die ondersoekbeampte sal die behoorlik geïdentifiseerde monsters na 'n aangewese openbare gesondheidsinstelling neem waar dit vir MIV getoets sal word.

Wie betaal vir die MIV-toets?

Die Staat. Dit hou geen koste vir u in nie.

Sal ek in kennis gestel word van die uitslag van die MIV-toets?

Ja. Die ondersoekbeampte sal verseker dat u die MIV-toetsuitslag ontvang, tesame met inligting oor waar u hulp kan ontvang om die uitslag en die implikasies daarvan te verstaan.

Wat indien die klag teen my 'n valse klag is?

Enige persoon wat kwaadwillig 'n klagte by die Suid-Afrikaanse Polisie diens ten opsigte van 'n beweerde seksuele misdryf aanmeld om ingevolge artikel 30(1) van die Wet, 'n aansoek te bring om die MIV-status van enige persoon vas te stel, is skuldig aan 'n misdryf en by skuldigbevinding strafbaar met 'n boete of met gevangenisstraf vir 'n tydperk van hoogstens drie jaar.

Sal die toetsuitslag aan ander persone bekend gemaak word?

Die MIV-toetsuitslae mag slegs bekend gemaak word aan die slagoffer of die belanghebbende persoon wat vir u verpligte MIV-toetsing aansoek gedoen het, uself (as die beweerde oortreder), die ondersoekbeampte, en waar van toepassing, die staatsaanklaer of enige ander persoon wat van die toetsuitslae kennis moet neem vir doeleindes van siviele verrigtinge of 'n hofbevel.

Sal die toetsuitslag in die verhoor teen my gebruik word?

Ja. Artikel 34 van die Wet bepaal dat die uitslag van 'n MIV-toets as getuienis gebruik kan word in enige daaropvolgende siviele verrigtinge in verband met die seksuele misdryf of om die ondersoekbeampte in staat te stel om dit as getuienis in strafregtelike verrigtinge te gebruik.

Hoe raak my MIV-status ander persone?

U MIV-status het nie slegs ernstige gevolge vir u beweerde slagoffer nie, maar ook vir u eie gesondheid en die gesondheid van ander (byvoorbeeld u seksmaat of baba). Elke persoon het 'n verantwoordelikheid om te verseker dat hy of sy nie ander persone blootstel aan die risiko om met MIV besmet te word nie. Indien u MIV-positief is, is dit belangrik dat u advies, hulp en inligting oor behandeling kry en oor hoe om uself en ander persone teen MIV-infeksie te beskerm.

Is daar enige diensorganisasies wat berading en ondersteuning kan voorsien?

Daar is verskeie private en openbare instellings wat u kan help om die implikasies van die MIV-toetsuitslae te hanteer. Sommige van hierdie dienste is gratis, terwyl ander betaling van 'n fooi mag eis. Dit sluit in:

- Privaat mediese en maatskaplike fasiliteite (bv. 'n algemene mediese praktisyn of sielkundige).
- Openbare mediese en maatskaplike fasiliteite, met inbegrip van —
 - Life Line
 - Child Line
 - Kinderbeskermingsorganisasies
 - Plaaslike Staatshospitale en Klinieke
 - Rape Crisis
 - FAMSA
 - Departemente van Maatskaplike Ontwikkeling
 - Plaaslike VIGS diensorganisasies

Die kontakbesonderhede van bovermelde diensverskaffers is in die telefoongids, by die ondersoekbeampte en by Korrektiewe Dienste beskikbaar.